



JAMHURI YA MUUNGANO WA TANZANIA  
OFISI YA WAZIRI MKUU

# SERA BUNGE NA URATIBU

JARIDA LA MTANDAONI TOLEO LA TANO

MEI 2023





## WAZIRI MHAGAMA Awataka wakandarasi ujenzi wa Mji wa Serikali Mtumba kuongeza kasi

Waziri wa Nchi Ofisi ya Waziri Mkuu anayeshughulikia masuala ya Sera, Bunge na Uratibu Mhe. Jenista Mhagama, amewataka wakandarasi wanaondelea ya shughuli ya ujenzi wa majengo ya Mji wa Serikali Mtumba Dodoma kuongeza kasi, na kufanya vikao vya mara kwa mara ili kuweza kutatua changamoto za ujenzi wanazokutana nazo.

Waziri Mhagama ameyasema hayo leo alipokuwa katika ziara ya ukaguzi wa baadhi ya majengo hayo na kuwaasa wakandarasi hao kujenga majengo yanayoendana na thamani ya fedha zilizopangwa na kuhepuka ucheleweshwaji ili kufikia malengo ya Serikali.

“Fanyeni kazi kwa pamoja na kuhakikisha mnaongeza kasi ya ujenzi, muwe na site meetings, tatueni changamoto kwa wakati, thamani ya

mradi iendane na fedha, hatuhitaji kuwa na delays yoyote katika ujenzi wa mradi huu,”alisema Mhe. Mhagma.

Alipokuwa katika Jengo la Wizara ya Utamaduni Sanaa na Michezo, aliwaasa Wakandarasi kutoka Shirika la Nyumba la Taifa (NHC) kutumia fursa ya ujenzi wa Mji wa Serikali kwa kufanya kazi kwa weledi ili kuweza kuuza ujuzi kwa wageni watakaotembelea mji huo wa Serikali mbeleni na kuwawezesha kuteka soko la Nchi za Afrika Mashariki na nchi za kusini mwa Afrika.

Kwa Upande wake Msimamizi wa Ujenzi wa Jengo la Wizara hiyo kutoka Shirika la Nyumba la Taifa NHC Mhandisi Aikani Mlekeo Alisema “ Tunaishukuru Ofisi ya waziri Mkuu Sera Bunge na Uratibu chini ya Usimamizi wa mratibu wa Ujenzi wa Mji wa Serikali Bw. Mesharck Bandawe, kwa kutupa Mwongozo mzuri katika usimamizi wa Ujenzi wa Mradi huu.”

Ziara hiyo ya Waziri wa Nchi Ofisi ya Waziri Mkuu Sera, Bunge na Uratibu, ilihusisha kutembelea na kukagua baadhi ya ujenzi wa majengo ya Serikali ikiwa ni pamoja Eneo la ujenzi wa Mradi wa Ofisi ya Mwanasheria Mkuu wa Serikali, Wizara ya Utamaduni Sanaa na Michezo, Wizara ya Maliasili na Utalii, Ofisi ya Waziri Mkuu Sera Bunge na Uratibu na Eneo linalojengwa Uwanja wa Mashujaa.



## Serikali kuzingatia mafungu maalum ya fedha kwa waviu katika utekelezaji wa bajeti ya mwaka wa fedha 2023/24

Waziri wa Nchi Ofisi ya Waziri Mkuu anayeshughulikia masuala ya Sera, Bunge na Uratibu Mhe. Jenista Mhagama, amesema utekelezaji wa Bajeti ya Serikali kwa mwaka wa fedha 2023/2024 pamoja na vipaombele vingine inazingatia pia mafungu ya watu wanaoishi na Virusi vya UKIMWI (WAVIU) katika kila Wizara na Taasisi.

Ameyasema hayo mapema katika Ukumbi wa Waziri Mkuu Bungeni Dodoma alipokutana na kufanya mazungumzo na Uongozi wa Baraza la Taifa la Watu Wanaoishi na Virusi vya UKIMWI (NACOPHA).

Mhe. Mhagama, aliendelea kusema kuwa hii ni namna ambavyo Serikali kupitia Rais wa Jamhuri ya Muungano wa Tanzania, Dkt. Samia Suluhu Hassan, imedhamiria kwa dhati kusaidia utekelezaji wa Afua za masuala ya UKIMWI nchini, kwa kuzingatia maeneo muhimu ikiwemo masuala ya lishe bora, dawa za kupunguza makali ya virusi na kuhakikisha mambo mengine yanayochangia ustawi wao kupatikana.

Akizungumzia suala la Sera ya Taifa ya UKIMWI ya mwaka 2001 Mhe. Mhagama alisema kuwa kuna kila Sababu ya Sera hiyo kufanyiwa mapitio na maboresho kwani ni ya muda mrefu na kuona, namna gani sekta zote zinaweza kushiriki katika suala hili ili kuweza kuyafikia malengo ya dunia ya kupunguza vifo, maambukizi na unyanyapaa ifikikapo 2030." Niwahakikishie kwamba sisi kama Serikali tunaweza kusimamia kufikia malengo haya ya dunia" Alisisitiza.

Kwa upande wake Mwenyekiti wa NACOPHA Mwalimu Leticia Mourice alimpongeza Mhe. Waziri Jenista kwa uteuzi wake na pia kumshukuru kwa juhudi za Serikali katika mapambano dhidi ya UKIMWI, aidha aligusia kuhusiana na maandalizi ya Mdahalo wa Kitaifa kuhusu uhimilivu wa mwitikio wa jamii katika mwitikio wa Taifa wa UKIMWI ifikapo mwaka 2030.

Sambamba na hilo alizungumzia kuhusu, uzinduzi wa Mpango Mkakati wa Taifa, ambao unalenga utekelezaji wa NMSF5 (Mpango Mkakati wa Tano wa Kitaifa wa Kudhibiti UKIMWI) na alisisitizia umuhimu wa ushirikiano, katika kujenga mwitikio wa kijamii katika mapambano dhidi ya UKIMWI, akitolea mfano maeneo kadhaa muhimu ikiwemo Uhimilivu wa Kisera.



## NEC Yaanza maandalizi ya Uchaguzi Mkuu 2025

Tume ya Taifa ya Uchaguzi ipo katika maandalizi ya Uchaguzi Mkuu wa Mwaka 2025 kwa kuzingatia utaratibu na vigezo.

Hayo yamesemwa leo Bungeni Jijini Dodoma na Naibu Waziri Ofisi ya Waziri Mkuu Sera, Bunge na Uratibu Mhe. Ummy Nderiananga wakati akijibu maswali ya baadhi ya wabunge walioomba majimbo yao yagawanywe

Amesema muda utakapofika, Tume itatoa tangazo rasmi kwa wadau wote wa uchaguzi juu ya kuanza kwa machakato wa ugawaji wa majimbo ili wadau wawasilishe maoni na maombi yao na hivyo kushughulikiwa kwa mujibu wa vigezo vilivyowekwa kikatiba.



## Program ya AFDP kuchochea maendeleo sekta ya kilimo na uvuvi

**KATIBU MKUU** Ofisi ya Waziri Mkuu anayeshughulikia masuala ya Sera, Bunge na Uratibu Dkt. Jim Yonazi amesema Serikali imedhamiria kuendelea kuwekeza katika sekta ya kilimo na uvuvi kwa lengo la kuchagiza maendeleo kupitia miradi inayotekelezwa na program ya kuendeleza sekta ya kilimo na uvuvi ya AFDP nchini.

Ametoa kauli hiyo wakati wa ziara yake ya kikazi katika Wilaya ya Morogoro Mjini na Kilosa Mkoani Morogoro alipotembelea na kukagua shughuli za utekelezaji wa program hiyo inayoratibiwa na Ofisi ya Waziri Mkuu.

Dkt. Yonazi amesema uwekezaji huo utachangia kuongeza uzalishaji katika kilimo na uvuvi hivyo kuchangia ukuaji wa uchumi wa nchi na kuifanya kuwa na chakula cha kutosha

Aliongezea kuwa uwekezaji huo utawasaidia wananchi kuendelea kujifunza katika maeneo yanayotekeleza miradi hii kujiletea maendeleo yao.

“Maeneo yanayotekelezwa miradi ya AFDP yataleta chachu kwa wananchi kujifunza na kujipatia maarifa yatakayowasaidia kujikwamua kiuchumi hivyo itumieni miradi hii kama fursa ya kipekee,” alisema Dkt. Yonazi.

Naye Mtendaji Mkuu Wakala wa Mbegu za Kilimo (ASA) Dkt. Sophia Kashenge alieleza kuwa, Serikali kupitia Ofisi ya Waziri Mkuu imeendelea kuongeza tija katika kuendeleza sekta ya kilimo na uvuvi kupitia miradi mbalimbali hivyo wataendela kuunga mkono jitihada hizo kwa vitendo huku akibaini mafanikio yaliyofikiwa na taasisi yake.

“Tumejipanga kuhakikisha kunaendelea kuwekeza katika sekta yakilimo mafanikio yatokanayo na sekta hii, ASA itaendelea kuwa na mbegu bora zenye kukidhi mahitaji yaliyopo,” alisema Dkt. Sophia





## Programu ya kuendeleza kilimo na uvuvi itachangia kuleta uhakika na usalama wa chakula nchini

**DKT. BATILDA**

Mkuu wa Mkoa wa Tabora Mhe. Balozi Dkt. Batilda Buriani amesema, Programu ya AFDP itasaidia upatikanaji wa mbegu za mazao zinazoweza kuhimili na kukabiliana na athari zitokanazo na mabadiliko ya tabianchi. Aidha mkuu huyo wa mkoa ameeleza kuwa Programu ya kuendeleza Kilimo na Uvuvi nchini AFDP italeta uhakika wa usalama wa Chakula,

upatikanaji wa ajira katika maeneo inapotekelezwa programu hiyo, pamoja na kuinua pato la mwananchi mmoja mmoja na Taifa Kwa ujumla. Mheshimiwa Balozi Dkt. Batilda ameyasema hayo mapema alipokutana na ujumbe kutoka IFAD walipokuwa katika ziara ya Usimamizi wa utekelezaji wa programu hiyo ya kuendeleza Kilimo na uvuvi (AFDP).

Akielezea kuhusu sekta za kilimo na ufugaji Mheshimiwa Balozi Dkt Batilda ameeleza kuwa mkoa wa Tabora ni maarufu kwa kilimo Chazao la Tumbaku na Ufugaji wa nyuki. Kwa Upande wake mtaalamu wa Tathmini na Ufuatiliaji wa programu hiyo Bw. Bernard Ulaya akielezea utekelezaji wa Programu hiyo mkoani Tabora, programu hiyo ameeleza kuwa programu hiyo inaendeleza kituo cha kuzalisha vifaranga vya samaki kilichopo Mwamapuli wilayani Igunga, shamba la kuzalisha mbegu za mazao ya kilimo la Wakala wa Mbegu (ASA) lililoko Kilimi katika wilaya ya Nzega, na Wilaya ya Uyui itapewa nafasi ya kuendeleza mnyororo ya Alizeti, Mahindi na maharage

Jarida la Mtandao limeandaliwa na kutolewa na  
kitengo cha Mawasiliano Serikalini  
Ofisi ya Waziri Mkuu, Sera Bunge na Uratibu.



KATIBU MKUU  
OFISI YA WAZIRI MKUU  
2 MTAA WA RELINI , S.L.P 980  
40480 DODOMA

Baruapepe, ps@pmo.go.tz, simu, +255262322480  
Fax;255262324534, Tovouti;www.pmo.go.tz

